

钦定四库全书

集部五

此山诗集

别集类四

元

提要

（臣）等谨案此山诗集十卷元周权撰权字衡之号此山处州人尝游京师以诗赞翰林学士袁桷桷深重之荐为馆职竟报罢然诗名日起唱和日多集中有赠赵孟頫诗云瓣香未展师道敬携琴暂出松萝中赠虞集诗云远游非涉声利途愿谒国丈开榛芜赠揭傒斯诗云嗟予观光老宾客瓣香仰止懷生平赠陈旅诗云下榻清风延孺子高楼豪气卧元龙赠欧阳元诗云牀头萍绿多矜色长价还从薛卞门赠马祖常诗云绝怜白髮南州士山斗弥高独仰韩而赵孟頫赠权诗亦有青青云外山炯炯松下石顾此山中人风神照松色之句且亲写此山二字为额以赠是时文章耆宿不过此数人而数人无不酬答似权亦声气干谒之流然孟頫等并以儒雅风流照映一世其宏奖后进迥异於南宋末叶分朋标榜之私故终元之世士大夫无钩党之祸权与诸人款契盖文字之相知固未可以依门傍户论也是集为陈旅所选定旅及袁桷欧阳元等各为之序揭傒斯又为之跋旅本作者故别择特精旅序称其简淡和平无鬱愤放傲之色桷序称其法苏黄之準绳达骚选之旨趣元序称其无险劲之词而有深长之味无轻靡之习而有春容之风今观其诗元所称尤为知言矣

乾隆四十六年十月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●此山诗集原序

诗有经纬焉诗之正也有正变焉后人傅益之说也伤时之失溢於讽刺者果皆变乎乐府基於汉实本於诗考其言皆非愉悦之语若是则均谓之变矣建安黄初之作婉而平羈而不怨拟诗之正可乎滥觞於唐以文为诗韩吏部始然而春容激昂於其近体犹规规然守绳墨诗之法犹在也宋世诸儒一切直致谓理即诗也取乎平近者为贵禅人偈语似之矣拟诸采诗之官诚不若是后苏黄杰出遂悉取历代言诗者之法而更变焉音节凌厉闡幽揭明智析於秋毫数殫於微眇诗益尽矣止矣莫能以加矣故今世作诗者咸宗之括苍周君衡之磊落湖海士也束书来京师以是编见赞意度简遠议论雄深法蘊黄之准绳达骚选之旨趣歷览名胜长歌壮吟亦皆写其平生胸中之耿鬱至於词笔尤为雅健读之亹亹忘味诚有起予者乃知山川英秀之气何地无奇才感叹之余因书此以赘其卷首延佑六年闰八月庚申前史官会稽袁桷序

风雅颂不作诗之变屡矣大抵与世相为低昂其变易推也近世为诗者言愈工而

味愈薄声愈号而调愈下日煨月炼曾不若昔时闾巷美刺之言世德之衰一至於此哉
我国家以淳庞雅大之风丕变海内为治日久山川草木之间五色成文八风不奸士生
斯时无事乎文章而其言自美况以文章而歌咏雍熙之和者乎此山周先生自栝苍来
京师访余灵椿寓舍与语竟日知能为诗因索其所作观之何其言之藹如也夫志得意
满者其词骄以淫穷而无所寓者其词鬱以愤高蹈而长往者其词放以傲先生懷材抱
艺蚤有意於用世既而托迹丘园不见徵用且老矣今考其诗简淡和平无郁愤放傲之
色非有德者能如是乎传曰温柔敦厚诗教也先生可谓有温柔敦厚之德矣余官桥门
七季凡四方文字当程校者莫不与寓目焉尝疑山林间必犹有可观者未之见也此诗
盖山林之硯礪而余所未见者乎故阅之不能去手因为选其最佳者得若干首题为此
山先生集云登仕郎浙江等处儒学副提举陈旅序

此山诗不但简淡和平而语多奇隽余为校选故能深知之也比翰林袁学士以其
才堪充馆职力荐诸朝吾恐此山不能遂肥遯之乐也旅又序

栝苍周君此山初以四明袁文靖公荐选预馆职君雅志冲抱垂成而归乃得肆力
於辞章所为乐府歌行大篇小章古律近制众体毕具往往多可诵之句顷国子生叶敬
常携其编诣余评之余爱其无险劲之辞而有深长之味无轻靡之习而有春容之风因
谓敬常曰周君其温然有德之士乎他日君乘小车来过余体充而气麗神腴而言扬此
其蓄於内者厚发於外者閎若合符契或曰能诗者不必有德有德者不必能诗君於周
君何以因言而知人若蓍蔡耶余曰不然古之人闻乐以知政诗与乐同出一初皆感於
性情而动於声音者也因诗以知人盖文士之通技也抑余不独因是以知周君之生平
且有以观世尚矣宋金之季诗之高者不必论其众人之作宋之习近骯馷金之习尚号
呼南北混一之初犹或守其故习今则皆自刮磨而不为矣世道其日趨於盛矣乎虽然
昔者子贡问子石何不学诗曰父母求我孝兄弟求我悌朋友求我信何暇哉子贡曰捐
吾诗学子诗矣若周君则有是三者而從事於诗者也其孰能过之因志余之说於是元
统二年八月初吉翰林直学士中宪大夫知制诏同修国史庐陵欧阳玄序

仆既序复见诗集留莆田陈君处陈为之精选又倍神采焉仆因致点校之助於其
间云欧阳玄识

●钦定四库全书

此山诗集卷一

（元）周权 撰

○五言古诗

拟古

洪钧播无垠八埏荡和风枯丛同华滋陈荑变纖茸高门与穷巷妩媚白与红阳和
不择地化育自至公惟人物之灵此理均降衷大朴日凋丧町畦生室中贵贱移亲疎贫
富乘始终谁能返其初物我俱玄同

东溟跃羲和西海骋望舒迭运不遑息汲汲司晨晡人生百年间有如涉长途途长日苦短何以寧其軀白露沾我衣众芳忽萎枯逝将蹶飞霞驻景凌方壶

黄河天际来喷薄万里奔寸胶使之清意坚水弥浑谁抱绿水操乃向齐门弹奈何殊所投舍弹起长叹

有客山中来遗我千歲苓肤腴淡无味色素少芳馨且言养真性服久能身轻膏粱匪吾有终焉佩高情

朝菌迷晦朔大椿阅春秋鹤长断则悲鳧短续亦忧人生贵委顺赋予不可求永惟南华篇达人谅悠悠

偃蹇涧底松婀娜原上柳春风少年姿辉映苍髯叟俗情厌孤直艷目分好丑徒抱霄壑姿落落谁见取竞把黄金丝送尽行人酒一夕秋霜飞柔条化枯槁懷材贵适用贞脆不同道谁为歲寒人共赏歲寒操庄周梦为蝶蝶梦亦蘧蘧子綦吾丧我隱几何嗒如忘形与忘情一念非异途作梦未必真似丧良非无垢尽见自明白生室乃虚忘言对青山悠然云卷舒

山中有孤松托根在深涧磊磊多节目偃蹇歲云晏岂无干云心亦有傲雪干萧飈起清奏可挹不可玩大雅久寂寥古瑟弦已断美哉遗音存伫立为三叹

读陶渊明传

渊明任疎散出处皆逍遥悠然解县组不折五斗腰晴川风日佳归舟喜摇摇及门对妻子不觉衣囊枵居贫道则腴念澹迹已超时复会田家兴至不待邀种豆在南山种苗在东臯投闲偶成趣心逸身匪劳孤懷托素琴万事付浊醪乐天以乘化内适何陶陶若人渺何许世遠不可招千載东篱花寒香翳丛蒿采采不盈掬伫立秋风高

田家辞

生长■〈亩犬〉畝中稼穡少已谙既壮忽复老支羸谢锄耰小舟杙断沟鸡鸣松树檐农闲子于茆春至妇亦蚕出门无遠途一室常团栾所期年歲登更愿官府廉官污歲复歉我突何由黔

篱畔白板扉墙头乌柏树负暄鹤髮翁衣绽绉老姬羣儿嬉翁前丁壮入场圃忽闻新诏下昨日减租赋比隣喜津津手额通相语悍吏无叫嚣晏然处环堵丰年乐无涯况乃生乐土牀头酒新篘前邨赛神鼓

紫凤吟

楚客青绮裘售我紫凤图且言观祥瑞与子悬座隅裴回感客意因以致我辞不能鸣朝阳高翔碧梧枝惜哉五章备乃向缣素施我图已在褐颠倒随天吴殷勤谢客去玩目非所娱

古乐府

妾有嫁时镜皎皎无纖滓照妾芳华年涂泽如花美郎行向天涯歲月忽逾纪空闺生遠愁妾容为谁理妾容匪金石寧复昔时比重拂故匣看炯炯光不已人情重颜色反

目如覆水愿郎待妾心明与镜相似

二

娟娟天上月乃有盈与亏
区区世间人宁无别与离
月亏尚有盈君别无回期
月腴重可待君信不可持
灼灼红槿花落落青松枝
单居无与俦贞白徒自知
人生良鲜欢乃复长相违
托婚昔未久幸无儿女悲
妾心有姑嫜君忘倚门思
川长舟可逝路远车可驰
人情不如月素光流妾帏

原上枫

青青原上枫春至扬柔叶
雨余似膏沐幽蔽深涧合
昨日原上行寒林净如削
此时涧中松偃蹇睨冰雪

古别离

天河限东西经岁别女牛
社燕辞归鸿亦背春与秋
人生苦离别别多白头十年
阻江汉音问何沈浮岂惟肠
九回轮转日万周君看江头
水东去无回流君看山上云
来往任悠悠

牧童辞

我牧不惮远牧多良苦辛
所幸牧已狎驯扰无败羣
平原湿春烟碧草何披纷
大牛隐重坡小牛饮芳津
旦出露未晞及归景常曛
时复扣角歌歌俚全吾真
取乐田野间世事非所闻
歌阑卧牛背仰见天际云

古塞下曲

朔风号枯榆厚地冻欲裂
大漠无人行长空欲飞雪
阴阴古长城野燐明复灭
草死沙场空饥乌啄残骨

桃柳词

灼灼绛桃花袅袅黄柳丝
风流少年场妖冶不自持
春风日夜变点拂飞故枝
飘红惹飞絮流水同天涯
美人丽南国兰蕙薰柔姿
青春妬娉婷笑盼生光辉
素丝感清镜朱粉难为施
奈何桃柳质岁晏徒伤悲

东林行

意行忘远趣所诣欲登仙
绝峡下苍黑半壁悬银泉
峯回路不定曳杖聊夤缘
延流忽舒旷楮楠影翩翾
恬目霁孤墅洗心玩芳荃
永昼无樵斤芳洲惬鸥眠
幽迥人境异似与隐者便
岩花映石濂渔舟起孤烟

怀别

青桑蔽繁阴玄鸟春将暮
东风老松花长林翳黄雾
俛首事铅简流光暗中度
淮水日夜流美人渺难晤
宾鸿尽北归谁与达书素
长歌复徘徊晴川渺烟树

暮春

众芳丽春辉天冶眩红紫
纷纷儿女情围香醉罗绮
笙箫夜呜呜申旦欢未已
鷓鴣何处鸣繁华总流水
谁知摇落时可以观物理

徐山民隱居

高人寡朋徒乃与世辽隔廓然方寸中不受外物役重林出新构袤广意所得材全
不雕朴墙圯不加白素琴与芳茗寔至适所适檐枝戛云浮芑萝自骈织朱明景长晦悄
怆过幽閭石寒水愈清寸寸落秋色神凄不可留题诗记崖壁

天竺古桂

幽幽只园树色界閤寶坊粲粲庭下桂秋光何炜煌道人外芳芬鼻观无来去妙意
了忘言坐久云生树

纪梦

夜炉翳红金玉虫堕玄煤嗒然据槁梧一适何悠哉冷风渺真趣寶界开玻璃彷彿
蓬与瀛珠宫映瑶台飞檐翼丹碧复砌明角圭仙姝粲华星靚服纷素霓双吹紫鸾笙劝
我白玉杯为我洗尘秽层襟雪崔嵬空明遡高寒云影相徘徊清诗吐奇怪可讽不可题
觉来已忘言月在枝南梅

游山寺

空林淨如扫石径穿岭细绀庐出深树飞湍下云际偶逢赤髭侣嘱我聽真谛菰肥
斋钵丰樾古佛灯翳周檐棘篱短野枳香入袂夕磬两三声半岩花雨霁

客中贈別

雪晴水生波有客系游鷁语离江上亭亭宇虚且寂老栢瘦入节色古根似石微阳
丽木末春意动寒碧莫嫌市酒薄贈子秦人策去去最自将子身贵圭

壁濯足

投迹处田野野僧日相亲昼暮松下石夜榻山中云流水何处鸣涧芳漱余春濯足
坐芳涧浩歌复谁闻

溪之濱

小雨淨川绿玩心鸥鸟羣拂薜憩幽磴松花点衣巾禅扃杳何处疎磬时遠闻青烟
湿山道牛羊下斜曛

春暮

春暮适川上意与流水长时有白云至遠帶松翠香手携渊明诗倦坐据绳牀悠然
宇宙间是非两忘羊

荷亭名清遠托意数语

养素任踈拙卜亭类蜗盘俯兹一酌池湫隘良可叹谁知方寸中而有万顷寬天光
发虚白心湛水不澜彼美君子华寓目道所存风细晨气润月澄夜香寒吸香咽沆瀣光
霁融肺肝兴寄言莫写念适趣自闲永怀爱莲翁时复一凭栏

悯蔬

富人厌粱肉贫士懷藟盐采芳得野荠终朝不盈簪矧兹春候和学圃濱涧南席地
歷疎块罌畦理长鑱孙芥紫芳茁早韭绿且纖亦复种晚菘釋角俄已含期此旦夕效菜

把日可添时阳忽久亢生意几不堪岂惮抱瓮劳灌沃终难霑马齿一何茂縱逸徒尔芟
所忧谷不登饥僅今乃兼矫首向昊旻霖泽何由覃

此山诗集卷一

●钦定四库全书

此山诗集卷二

（元）周权 撰

○五言古诗

来故人

东林旦气白清旭含初景空斋松桂幽光动离离影俄聆剥啄音车马何炳炳我本
黜世虑脱落如废井屏迹谢时彦兀坐息造请喜兹共萧闲妙论得新警夜凉月满川中
流啸烟艇余音袅秋风清兴与川永

仙源

桃花悄无有仙源渺何许流水清矜铜松色与崖古长林暮萧飏似与幽人语翛然
卧空庵清猿夜深雨

幽居

索居简人事与世意罕投柴荆已就理歲功念西畴落落鸡犬墟隱隱渔樵洲啸傲
一壺绿聊复写我忧及辰寓冲赏独策还经丘向夕山景霁延瞩明川流白云息空谷归
鸟鸣林幽人生亦委化汲汲将焉求

南山丈人

丈人山南来鐵面冷松露野芳墮春妍香入青芒屨逍遙憩幽磴睨我如有素即之
亦无言还带山云去

玄上人

安禅简清素趣与外迹绝玄谈落松风洒我一襟雪逍遙花雨外岂复念浊热夜久
白河沈捣檐耿疎月

访友

闲携绿玉枝遠詣诗老家断涧秋木落寒沙炯泉花高谈意偶合脱落逼仄歌從容
饭雕胡屡瀹粟粒茶亦复事文翰醉字萦秋蛇慷慨振吟袂归途及栖鷗

秋原

晴烟淡秋原枯梢翳残叶兰芷徒自妍芳馨谁采掇岂无同心人歲月念飘忽咏思
河水深迢迢暮云合

接竹引泉

苍润隱石脉幽源迸山椒连筒入云窦势接河汉遥引兹一线秋高下穿林梢聯絡
裊相拄旋折不辞劳挽之归我庐晴雨注屋茅乍室或细细久续俄嘈嘈空堦落琴筑虚
瓮鸣钧韶盥浥足自洁心迹良已超固无鼎釜珍颇煮溪涧毛未能学许由厌喧解风瓢

谢僧茗饼

僧达无生机寂念若冰冷汲来石根泉瀹以云腴饼舌端味枯禅了然发深省归策石林空清飏下松顶

白水晁居士名家驹也脱俗嗜饮所居有断崖夕翠轩留偈而化赋此寄悼

晁子摩尼珠照彻白水源不啜赵州茶不面达磨禅山饼泼乳酒潇洒夕翠轩飘然忽谢去遗偈如涛翻逝鸿无留影落叶返故根寂照本非灭今灭昔岂存苍苍断崖陰寒移自清妍

答褚思

古褚公何为者处钝以藏兑哦诗古松根古人思遠詣疎懒意自真客至忘冠带流俗岂同调目击趣自会素琴固不泽抱朴乃不败悠然流水意本在徽弦外溪暖潜鳞跃野夕归鸟逝与子尽樽中渔舟具清瀨

次韵张洞云

张子湖海襟乃复喜岩穴朝食进芝髓夜诵然松节深云暗幽洞仲夏欲飞雪下春炫余景林水互明灭欵客垂磬室颇感十年别携琴意已消酌茗石萝月

褚涧月

道人澹无为懒散忘盥栉扫石秋树根曙涧濯残月袖浥水光润履带水翠滑虚阑倚云歌清猿共孤绝

湘中

天寒楚云淨木落湘山幽空江夜来雨水满芦花洲西风何渺渺沧波日悠悠有怀谁与言注目孤鸿秋

西山

西山一何佳税驾谢嚣尘独往殊有趣野鹿如亲人泠泠涧下水练练山际云幽憩任疎散岸帙青枫林

夏日偕友晚步饮聽泉軒

终日局环堵散策穷深幽嘉我二三子落落成罕俦适意随所詣行行遂经丘青松如高人含风自萧飏夕云度深翠爽气衣上浮石根泻幽泉戛戛锵琳球乐彼泉上趣幽构飞岑楼新兰秀而滋旧竹清且修欵我情颇厚清樽频献酬盘桓有余乐啸傲成迟留池深风露香荷意澹欲秋饮散众喧息微月生林陬

用前韵

夏郊景气清况我冲抱幽深居节已换眷眷懷良俦人生磊砢胷要贮壑与丘振衣一长啸凉吹来飏飏贯石有飞泉隱见晴云浮初疑奏琴筑忽若鸣琅球寒光荡林翠爽气涵山楼相期濯尘缨慰此情好修引瓢酌深绿素赏欢已酬了忘区中緣便欲为此留松深日云夕练紈早知秋彼美天际云归来宿岩陬

松下泉

长松荫层峦黛色入崖骨鬱为翠雪浮蒸滃香不歇融液作寒泉飞迸出石窟不濯
软红尘空山泻明月

九日偕友登东岩定香寺

兹岩何穹窿迥出尘壤隘当时补天余偶堕灵鳌背神丁挟奇功塞北沧溟滙翠涛
化千峯尚作掀舞态色连空宇高气薄坤輿大绀庐切层云粲然金银界犹封开辟土迂
旷无斩剃至今绝顶泉下迸万丈内陰阳互轆轳造化自根蒂崖壁凿灵境洞壑橐寒濑
旁开一罅峡天影落清黛陰岚洒晴雪夏练结幽晦石门耸峩峩屹若剑门势在昔乾符
间绿林肆凶厉托兹保遗黎残石犹纪载憑高达遐观访古起余慨荡胸泻河汉散髮沐
沆瀣烦襟忽如遗举步寄一快携朋作重九秋高崖菊细浊醪灑华觞浩唱发雄迈仄身
下天磴百盘经险怪目眩神萧森冷风荡归袂人生諒逍遥歲月岂余貸吁嗟谢公展云
此遗胜概回首山苍苍夕钟渺云际

山中云

空山有白云雅与高人约卷舒本何心乃似悦遐瞩色幽淡山翠意遠度溪绿日暮
久徘徊前村雨应落

次韵幽居

晨兴启衡门见此溪南山山光入溪绿水底明青鬢熙熙自渔樵清歌时往还莞尔
发永晤寔我丹青间

西山书馆植菊为隣豕所践

耽书息世虑种菊祛俗尘闲携手中书往访西家隣雨露分寸苗书暇策我勤无何
彼艾豨縱逸戕其真懷哉楚屈平憔悴穷夕曛荣枯固有数怅然念芳芬信知洛中花乃
壤逸驥羣宁如拥肿樗不夭匠石斤挟策嗟自误亡羊监前因所贵本根在生意喜复信
歲晚同襟期而我及数君采芝岂辞汉种桃非逃秦摘英泛浊醪孰非东篱人

清溪深

连娟数里洲翠篠何森森微风动枯箬谡谡鸣空林雨散幽猿啼野树烟沈沈薄暮
有遥棹欸乃清溪深

相逢吟

客從郢中来抗志青云表持螯共拍浮江遠孤舟小寒夜潮气白楚树晴乌早酒阑
起推篷落月在西岛

读张巡传

我怀张睢阳厉节刚不吐妖氛暗■〈宀禹〉县奋迅提虎旅憑城怒裂眚忠勇激
肺腑擐甲四百战奇计不可数江淮卒保障藉此奠唐土可怜将孤军机势已莫御食尽
兵亦穷爱妾入鼎釜雷南空桓桓余勇不可贾身城遂俱亡大义著君父人孰不能守公
守以死拒人孰不有死公死乃其所繁霜表贞松迅水知砥柱当时偷生輩洪濶犹妾妇
青灯抚遗编英气凜千古

明妃曲

逝水无回波去箭无返筈十载昭阳春万里龙荒月风沙满宫衣惨淡余香歇哀弦
湿丝泪泪尽弦亦绝寄语汉飞将此计诚太拙蛾眉岂长好不久为枯骨

高邮府神游台

淮南古奇胜弥茫云水丽邨城枕其中喧喧拥闾闾壮览城之阜飞台翼云际灏灏
白银盆沈沈水晶界玩心神明表引兴天地外把酒一凭阑天风落襟袂懷哉淮海翁落
日为三酹

此山诗集卷二

●钦定四库全书

此山诗集卷三

（元）周权 撰

○七言古诗

呈伯长袁学士

玉堂中有真仙人锦衣剪制五彩云瀛州高处睨八极奎躔光气胸中文挥毫对客
惊风雨词翰风流迈前古榻前草制回天颜夜归长照金莲炬龙门賓客何缤纷一经品
藻生阳春斯文之寄盖有在孰不奋励激陶钧蹇余鄙陋真无似家在江南万山底石盆
鑽木不能穿半世吟哦事芝髓可怜歲月空駸駸高山流水无知音黄河泰岳何高深见
公不负平生心

徐仲晦作书惠水墨梅圖有和靖题纪歲月絹素蠹败余字不存作书归之

溪藤搗霜寒夺目硬黄瘦字疎相续墨花出袖吐春妍一片玲珑水苍玉分明寄我
孤山图上有歲月书林逋古册漫漫篆窠暗败素飒飒形神枯西泠桥畔黄昏景船头鹤
梦风吹醒一從马鬣鎖荒寒万古人間几香影苦吟老尽诗坛豪穷愁到我心徒劳还君
此画三太息雪晴月映横牕梢

羸骥行

高秋吹霜沙草衰駟駟牧野无龙媒伶俜羸骥空伏枥长稽短豆随駟骀筋耸脰高
眼如井月冷沙空徒顾影飒辣长嘶万里心雄姿困顿无由骋乃知天闲十二屯如云龙
膺豹股八尺身蹴翻青云振绿髮金羈照耀皇都春朝辞天山暮碣石飞电流云迈无迹
风姿欲軋拳毛騶意气能倾照夜白短衣奚官霜虬须圉養刍粟多遗余绝怜羸骥不满
腹翦刷犹可同驰驱我欲进之嗟遠道神全形枯难自好按图举世识骊黄懷哉骏骨秋
风老

惠山寺九龙峯下酌泉

惠山鬱律九龙峯磅礴大地包鸿蒙划然一夕震风雨欲启灵境昭神功六丁行空
怒鞭斥电火摇光飞霹雳一声槌破老云根嵌洞中开迸寒液道人甃玉深护藏镜涵万
古凝秋光陆翁甄品亲试尝翠浪煮出松风香我来山下讨幽境自挈瓶罍汲清泠味如

甘雪冻齿牙紺碧光中敲凤饼昏尘涤尽清净观心源点透诗中禅亟呼陶泓挟玄玉挥
洒字字泉声寒投闲半日聊此驻孤棹明朝又东去红尘人世几浮云钟鼓空山自朝暮
次韵徐景端席上

洞庭霜橘包黄银海边丹荔输闽珍高堂开筵荐华俎风味隲美怀芳新蒸花压玉
飴鶯炙雕盆犀筯行鲜鳞纷纷歌管奏名妓秩秩簪履罗佳賓芳樽细酌绿琬琰寶罍共
拥红麒麟烧残绛烛转留客疑有四角生车轮书生商歌风雨室此志鬱鬱何由伸短衣
穿肘不掩胫五穷相与为雷陈青阳开动生意达短翅亦拟凌空云豫章遠志各有适黄
钟瓦缶俱陶钧且安簞糲盘涧濱未厌紫豉羹吴莼

赠雷紫崖高士曾筑室於华山

紫崖高人头欲雪神清貌古髯过膝秃蛟入砚生云烟叱咤风雷鬼神泣清霄幽梦
回瑶坛鼎中龙虎催九还飘然晞髮太华顶醉睨海浪天风寒謁来访我苍溪浒白石清
泉不堪煮共谭世事两茫然竹屋青灯夜深雨

牧羝行

朔风吹沙浩漫漫冷光射目愁云昏茫茫大漠亘万古何处有路通中原羣羝牧老
草枯死倚节自誓无生还餐毡啮雪气自倍婉孌儿女怀饥寒夜长空望汉月白几度吊
影怜羈单已将傲兀压忧患独仗大义排坚顽此生自信羝不乳岂意雁足传间闕归来
属国岂不厚区区一饭皆君恩

鸿门宴

项王高宴鸿门北风云奔走天为黑椎牛刺豹酒三行谈笑戈矛生顷刻岂知天命
非人谋玉玦三提事何益兴亡楚汉两干将开辟乾坤双白璧暗鸣漫说万人敌龙准天
人竟谁识玉斗声中霸业空乌江江水还流东

纪信叹

沛中龙奋芒砀云咸阳楚炬三月焚两雄角起鹿在野三户有楚无强秦貔貅百万
纷如雪戈矛尽染英雄血旗旄晓蔽天河云兵尘夜暗中原月荥阳数载战不休重围食
尽汉亦忧将军诈帝出降楚脱帝虎口真良筹无何诸将已平楚事定论功裂茅土独无
旌美到将军不得褒名纪盟府男儿死节志已酬瞑目地下夫何求吁嗟功怨俱悠悠汉
廷雍齿还封侯

赤壁泛舟

赤壁之山何峻嶒下有江水何清泠天空月出夜寥泐玻璃万顷涵秋水为问黄州
雪堂老迁官何如谪官好酒酣携客夜拏舟忧患都将谈笑了划然长啸来天风神游八
极世虑空但见横江秋露白错落低垂斗柄红举袂欲挹浮丘公洞箫声断潜蛟舞月下
清樽贮千古老瞞当日困周郎十万楼船鬪貔虎烟销水冷沈戈矛空余野燐寒沙头江
中牢落满陈迹追忆往事懷风流胜游到我知几度感昔视今犹旦暮乾坤何事老英雄
袞袞长江自东去

赠笔工王子玉兼能书

兰陵有客髯如戟吴霜满鬓秋萧瑟广寒偷拔老兔毫归寓管城汤沐邑兴来忽驾
钱唐舟惠然访我苍山陬酒酣作字大如斗玄云落纸香浮浮我慙识字先白首故砚磨
穿笔如帚与君邂逅两忘年暮雨江湖一樽酒

赠画牛褚水壑

魁形硕骨高峻嶒弭角垂耳行凌兢蹇余已向田间老一见此图知画好春郊雨后
烟草肥吴犍十角相追随前行过浦一回顾后行馼■〈馼，束代爻〉不敢渡牧儿笑
怒急掉鞭蚩粟劣黠冲争先簑衣不脱春烟暖一笛斜阳牛背稳虽然此笔全於天安能
为我畊砚田我今身似扶犁者此景此牛何必写好從天廐图骅骝气厉八极凌高秋

子陵钓图

东都热官手可炙吴侬面似秋江色平生落拓一羊裘七叶貂蝉不堪易功臣尽在
云台中丹青化作灰尘空先生遗貌乃在此钓竿尚袅桐江风悠悠世事江云白过眼轻
帆自朝夕人间万古仰孤风天上有星犹是客

清溪张归云不嗜酒肉工诗安贫所作少年行因次其韵

五陵年少风流客花间开宴春壶碧豹胎熊掌罗玳筵犀筋逡巡万钱值绮罗吹香
围肉屏枵枵银甲喧瑶箏高烧红蜡作长夜白日过眼如流星可怜气岸如山阜雨散云
飘不能久繁华富贵忽如梦昨日朱颜今白首争如芝田野老衣悬鹑饥撚芝术餐芳年
新诗日富不厌贫谓有尧舜为吾君少无逸乐老无戚尺泽自可潜幽鳞谁知清溪有鹤
不可驯白云浩荡青林春

次韵张刚父观物轩

观物之变观化原游物之初游於天万象起灭随飞烟守之惟一天乃全秋风叶落
春花妍盛衰老壮人皆然潜机剥复相回旋至理妙契言难传张君目击道所存身具太
极谁参玄返君观物观诸心我心外物安能迁鹤长凫短随所便莫问漆园齐物篇

次韵褚仲明苦热行

烛龙衔火飞南陆万叠云峯天地窄鲸波沸海泣阳侯涸尽泉源烁金石人间何处
逃隆暑细葛如裘汗如雨苍生堕此深甑中救渴何时命如缕我欲太华峯头酌琼液醉
卧青瑶啸松月明星邀我玉井旁共折芙蓉弄香雪扶摇直上九万里高揖卢敖太空裏
手攀斗柄睨尘寰濯足银河弄秋水

锦鸡

巴山灵鸟初离羣葳蕤丽组云锦文羽翎新刷爪距利采色胜似沙头鸳晴瞰入户
烂相射嗉中有物垂红碧绶光若若花盘绦出示山童有矜色文章固足媒尔身雕笼拘
縶还悲辛区区啄饮岂不厚情深野树溪云春

焦山寺

赤霞夜出扶桑东海云卷浪凌虚空刚风浩浩吹不去崔巍化作青莲宫万衲月寒

清楚寂四面沈沈皆海色钟声不许到人间自送潮音落寒碧

八咏楼

金华尽是神仙府羣王峯高青可数绛气光腾竇婺躔婺女從來司此土峩峩飞观矗云巔幡幢香鬻罗真侶穷高更上沈郎楼万象憑栏一挥塵双溪上溯银河流卷地寒波翠蛟舞诗人去后景物闲山月溪风自賔主当时八咏画图间翠琰娟娟羣凤翥高秋落木天地寬独酌清樽慨千古浮云世事两悠悠突兀空楼老风雨

次韵岳宰

旧交落落十八九万事從渠屈伸肘东华尘土少年忧歲月无情一回首岳君气爽太华秋不随王粲悲登楼熙朝已具清庙器吾道岂复归山丘文章谁道同刍狗还有问奇人载酒清谈洒洒秋荳露饱食官羊宁有数旧家桃李春漫漫流芳枝叶才堪看江梅自分托歲寒一枝遠寄懷清欢

次韵邵本初

词源倒峡惊涛吼不羨当年燕许手快意闲观未见书约客满浮无事酒骊珠光迸锦囊裂一生不掉仪秦舌有时一舸访逋梅梨云梦觉西湖月有时歌骚湘雨霁采得秋兰纫为佩归来溪上赋闲居不着闲愁生感慨丈夫出处何可测量材定有古玉尺近闻黑廌上霜台暂作红莲幕中客

次韵友人

忆曾共醉高阳池银毫翻墨摘乌丝江鸿海燕忽相背几度夜雪山陰时东华尘土黑貂敝南楼月好思元规十年始赴鸡黍约春雨剪韭供新炊青灯对坐落寒烬夜谈亶亶真忘疲天根妙意秘莫写心薄万古含清辉通家交好固不遠從容砚席还追隨划来健句脱秋隼清似菡萏开秋陂翩翩瘦字老蛟舞入妙信划沙中锥手弦绿绮不可和楚天目尽孤云归

舟行阻潮

江流浩浩吞长天打篷巨浪翻银山篙师维舟不敢发东望微茫尽溟渤荒村古渡生客愁丹枫落叶秋飈飈夜半西风卷江雨咿轧数声闻过櫓风收雨霁晨气清金乌荡漾波间明舟人欢呼指归路十幅蒲帆顺风去

和万象庵枯木竹韵

物生字内有万殊本之一气随盈虚木兮竹兮岂同类吾自丧吾渠忘渠神全形枯真散木束翠稜稜一丛竹岂其无用全天年犹有琅玕在其腹苍苔蚀尽风雨根岂愿斲削为牺尊歲寒相与数君子满目桃李争新春

寒碧轩

钟山■〈穴上幻下〉深仙所宅道人栖真外形迹一粟中间世界藏心自寬闲轩自窄默然宴坐守玄牝清梦都无室生白古曾元自貯冰雪幽兴时能寄云石烂柯仙去石枰空野鹤翩跹松露滴人间酷暑到无处一一琅玕照瑶席快意萧萧风雨寂寒倚晴

空数峯碧

采莲曲

越溪女郎十五六翠馆香云双凤蹙嫣然一笑似花妍艷试新妆照湖绿罗衣露浥红芳秋少年陌上情绸缪兰桡容与隔花语惊散鸳鸯生晚愁莲花莫折茎有刺藕丝易断针难度清歌一曲入湖烟空载香风满船去

西瓜

当年传种非东陵蒲萄石榴来与并碧壶深贮白沆瀣霜刃冻割黄水晶豪家宴客侯鯖列浊酒鲸吞嫌内热此时专席荐冰盆分与风前满襟雪

此山诗集卷三

●钦定四库全书

此山诗集卷四

（元）周权 撰

○七言古诗

次韵谢益洲贺生孙

清标壶冰炯人目惠然共剪西牕烛酒酣慷慨意气倾且羨堦庭有兰玉阿翁堂上白髮新自意培塿无凤麟娱情聊尔慰欸欸流庆未必夸诜诜君家珠树春风裏聯芳竞赏无凡子甯家宅相魏家儿换叶移根愿同此

春夜诸弟邀饮因观海棠

东风花谷纷红紫九陌轮蹄隘香雾风流炫燿花中仙万斛胭脂滴红露天然富贵出幽姿一顾倾城谁敢妬摇摇风雪未轻飘缈缈彩云飞不去传觞花底溜红光银烛烧张最高处团圞燕乐怡天伦共忆儿嬉有真趣安得花前再少年捶鼓插花穷胜事百年光景难把玩天马途深感迟暮人生流坎委大化縱尔浩歌吾起舞高堂饮散夜沈沈社雨阁寒春欲曙

欧阳公虽不到杭而惠勤师思之因所居有涌泉出因名之曰六一泉

欧公天人世无匹六物之中目为一孤山山下西湖西飞梦逍遥绕云石凿开瑶窟迸银泉水镜胷中湛虚白是心洞洞何所容内照此泉皆外物坡翁好事镌苍珉醉墨雄翻扛鼎笔至今草木余清辉冠剑一时随戏剧两翁神与造化游鞭驾风霆挥八极垂光后世几千年名不可磨泉不竭

夜泊吴江

弥茫巨浸无坤轴溶溶一镜天东北两虹渴饮驾空来千寻横截玻璃碧啮堤骇浪飞晴雨晦冥白昼蛟鼉舞万家灯火水晶宫令肃貔貅夜挝鼓斗柄衔城湖月白清愁恼我江南客安得风流张志和共醉渔舟擘长笛

王张二提举携酒驿亭饯别因次同舟李彦谦韵

立马沙头一壶酒故人饯客官河道水蒲芽白沙柳青东风点拂春多少春波浩荡

快杨舲满目好山青不了人生漫浪如浮萍世味苦辛如食蓼天游笑我外形骸俗眼従渠分丑好秋毫太山两不足箕斗虚名我何有人间汨汨声利塲昨日少年今白首繁华万事风雨歇曲树深池几芳草凄凉旧燕语乌衣飘零老鹤归华表忆曾高楼夜呼酒剪烛聴歌声缥缈酒酣耳热捐寶钗客主相欢意倾倒只今憔悴酒徒散桃花已笑刘郎老胸中耿耿尚如昨濯足新丰歌浩浩揽衣中夜起徘徊抚剑灯前感冲抱参横天外落霜鸿一声画角秦淮晓

雪轩高士以白紵制服作诗戏赠

经水纬玉纷縱横三盥寒露方织成晓机裂下不敢玩一道雪瀑来中庭天然精洁不可浣犀熏麝染慚吴绫制成素服轻於雪雅称仙官锵珮玦星斗离离夜插椽高兴飘飘白云阙乘风便鞚紫鸾车琼箫吹落蓬莱月

梦访苍山道士醉卧不起坐聴鐵冠散人鼓琴觉后属成

道人醉卧呼不起春风吹花满乌几鐵冠散人石作肠一曲泠泠写流水曲终意远流水长幽襟炯炯含秋霜一声野鹤不知处云霓明灭山苍苍

金山龙游寺

金山突兀摩青冥六鳌驾海来蓬瀛风涛卷雪撼不动中流涌出毗耶城山僧眼底乾坤濶俯瞰朝曦乘落月钟声薄暮来蜃楼灯影晴霄入蛟窟马衔韝怪苍龙蹲聴法卧护孤云根参旗歴落倚阑楯金碧照耀沧海门天光万顷涵虚碧扁舟独舣玻璃国六朝兴废几英雄往事云浮江露白穷高一览双眼明天风洒我毛骨清淮山数点不可写矫首九万抟风鹏

髻社湖

碧天如幕沈云影飞廉不怒银涛静骊龙正睡贝宫寒一镜光凝青黛冷数声渔笛来何处白鸟双双忽飞度夜深明月生孤篷人在广寒卧风露

八里庄渡淮入黄河水浑不可饮过徐入清河水方澄洁信笔闲记

河流汨汨如泾水浊浪崩腾疾驰驶一石中胶数斗泥舟客居民皆饮此黄河不复行故道下注清淮通海涘十人度索上一洪寸寸强弓挽难起屹然跌坐如僧禅日与篙师同愠喜青山一髮认邳州萧条暮上鱼豚市酒边一笑我何为独冒惊涛行万里争如林下混渔樵俯仰啸歌行复止回头寄语北山云征尘待向风泉洗

徐州暮泊风雨骤至

清河绿涨琉璃堆黄河浊浪排空来两流合一混泾渭喷薄东注无时回孤城迤■〈亼里〉枕其左昼夜怒激声喧阗人烟蚁集一閤市夕阳孤塔空崔巍客舟簇簇闹河浒极目但见烟中桅黄垆呼酒足自慰愁城顿破红颜开须臾笑电急驱雨神物双幻令人猜狂飈扬沙昏白昼黑云卷地翻风雷

鸡鸣台

横空阵气长云黑戈鋌照耀旌旗色龙跳虎跃神鬼愁楚汉存亡一丝隔相持两地

皆雄据楚力疑非汉能拒瑞启炎圖芒砀云悲歌霸业乌江路空遗故垒传遗迹离合山河几劲敌战尘吹尽水东流落日沙场春草碧

鲁桥

泗河汨汨流青铜鲁桥突兀横长虹惊波荡潏石鬬怒石门空洞如弛弓风霜剥蚀势欲压乱石齿齿填深洪南连淮楚九地厚东导齐鲁羣流通征商懋迁百货阜来帆去棹纷奔冲车轮彭鎬铎声急马蹄蹴跃尘影红我游天京偶经此一见淳俗真尧封扁舟胶涸守连日欲去未去心忪忪嗟余行役浪自苦飒飒吟鬓将秋蓬摩挲残碣讨遗迹搔首蹢躅斜阳中衔杯一洗胸芥蒂浩歌目送吴天鸿

谪仙楼【山东济州】

大罗仙人李太白秋水疎莲浮玉色一来金马玉堂中诗酒猖狂天子客飘飘豪气秋风起登楼曾醉山东市放浪形骸宫锦袍荣华富贵东流水酒酣挥洒翻河笔险语能令神鬼泣至今光焰照尘寰一字堪偿双白璧我来懷古空凄怆风月千年尚无恙何时相见昆仑丘汗漫從游九天上

济南原上

朔河春透水未裂黄芦伐尽洲渚濶荒祠老栋压欲頽古树无枝根复活长嘶飞骑抹流云草舍微茫聚疎樾夕阳返景低黄埃漠漠平沙浩如雪

原上

风卷长河雨声歇掠面惊沙草如雪乱山青尽天茫茫万里孤云没飞鹄啼乌城上行人稀白杨萧萧冢累累目断清明原上路日暮纸钱撩乱飞

冠州

临津冲要环墟市横桥断岸人如蚁车声轧轧风蓬蓬道上黄尘半空起御河柳色如蓝绿翻翻酒旆风高矗归马声喧烟火深落日孤城催暮角

呈赵子昂学士【号松雪】

蓬萊仙人似松雪曾向天潢遡银阙天孙为制紫绮裘五色云边佩明月近闻承诏白玉堂词头夜夜风雨忙一挥九制夜未艾金莲分赐宫壶香淋漓妙墨蛟螭走世有钟王皆敛手偶然醉帖落人间只字珍藏抵琼玖我家浙水苍山东闭门偃卧甘诗穷瓣香未展师道敬携琴暂出杉萝中问公何日作霖雨只把文章事明主愿恢斯道泽斯民奕奕光华照千古

赵子华乃蹶弛之士齿新气锐痛饮豪吟座中未有出其右者

赵君胷吐虹五色饮酒哦诗世无敌夜寒濯髮当银潢酒星飞入锦绣肠眼花耳热忘尔汝笔阵如云来黥武百番王版连秋霜空中错落天葩香千奇百怪驱风雨露泄玄机鬼神语须臾收敛寂无哗依然醉盃翻流霞

元正观朝贺

斗杓半夜回天东人间凤曆开华风聯鑣飞盖拥千骑家家银烛摇春红金门玉漏

声初歇已闻晓钥开闾阖圣人端拱九天上殿前晓仗催班列瞳瞳瑞日红云开太液春
生万寿杯龙旗微动曙烟暖山呼虎拜声如雷乾坤千载开元会太和气象唐虞世千官
宴罢带花回十二天街喧鼓吹

龐眉黄冠方外奇士也携山水圖求售知余不纳必欲求诗

鐵冠鹤骨玄都仙清晨过我谈重玄手中衡霍堕尘几缟素飒飒开风烟正嫌客舍
如舟窄挂壁恐渠冲破屋急教童子卷还师始觉眼前无突兀

呈虞伯生修撰【自号青城山樵盖蜀人也】

青城仙人清且都眸炯岩电胸冰壶锦裳照耀青霞裾水玉作佩聯明珠馭风来直
承明庐贊述大道光唐虞朝阳孤凤鸣高梧冀北骐驎空羣弩蹇余濩落山泽■〈月翟〉
抱瓮汲涧浇畦蔬遠游非涉声利途愿谒国士开榛芜顾公磊落世所无文章价重真
璠璵木天咫尺何时居家声自是行秘书

客枕

寒更四点鸡未号行人道上声嘈嘈酸风惨栗寒鼯鼯长河争渡冰坚牢霜花着面
肤欲裂虬髯稜稜冻欲折征车卷地声如雷骆驼吼落燕山月

蒲萄酒

翠虬夭矫飞不去颌下明珠脱寒露累累千斛昼夜春列瓮满浸秋泉红数宵酝月
清光转穠腴芳髓蒸霞暖酒成快泻宫壶香春风吹冻玻璃光甘逾瑞露浓欺乳麴生风
味难通谱縱教典却鸛鷖裘不将一斗博凉州

子昂学士为余作此山二字并作诗见畀其诗云青青云外山炯炯松下石顾此山
中人风神照松色又云爽气在襟袖清风拂丝桐悠悠适天趣宴坐心融融书此以谢

一丘合老渔樵席诗声误落燕台侧夤緣得见玉堂人面带九霄风露色夜光烂烂
明月章惠然堕我云山旁临风讽咏松色句草木往往回春光松根老屋此山字娟娟寶
墨浮寒翠行人屋外屡徘徊日落山空有虹气晨牕梦觉秋意清三盃菊露呼陶泓开襟
感激浩难写万古不尽山青青

此山诗集卷四

●钦定四库全书

此山诗集卷五

（元）周权 撰

○七言古诗

古琴漆有蛇蚺纹者材之良也道友携一琴甚古谓是零陵湘石枯桐斲成索价三
百缗无偿之者戏作湘桐吟

黄钟沈声喧瓦缶良材入爨知多少谁裁鸣凤千年枝蛇蚺龙纹巧蟠纽泽坚古漆
光不磨徽弦不具含云和已无伯牙之手子期耳三叹如此湘桐何

夏日访黄府尹席上次黄德厚韵

畏途漫漫正烦热故人一见忙解榻竹根冻绠汲寒泉一室空明意清豁夜凉华月流素光忻然狎客飞琼觞千篇已羨奴岛可五咏未许余山王绮筵秩秩罗珍具蔗浆盃冷芙蓉露浩歌夜久兴徘徊残蟾西没斜河曙

军中乐

甲光半夜开金鳞旄头射落天边云征鼙声冷沙塞月朔风马上驱妖氛归来天幕宴平楚貔貅列瓮燔豹麕虎皮裹戈马在牧将军好武亦好文诗成顷刻手自写草书敏妙疑通神文锋快剑斫长阵笔力巨弩回千钧酒酣作乐两耳热对客谈笑如春温笑余早亦学书剑一镜白髮俄纷纷袖中空有清河颂愿借彩笔挥寫呈吾君

冯潜夫归蜀有作歌以相其行者因借韵为饯

霜横空兮气凝肃风惊沙兮声簌簌送游子兮西还膏吾车兮渡泸曲子之家兮岷峨西行万里兮居将卜蜀道难兮猿攀縁峡水怒兮龙喷薄顾万钟兮焉求安一瓢兮自乐田寛闲兮涧阿山窈深兮盘谷钓清溪兮友吾鸥歌白石兮饭吾犊食无鱼兮不如归返屠羊兮分自足嗟岁年兮迟暮念众芳兮摇落嗟聚散兮须臾将气谊兮永托歌击节兮尽欢属离觞兮更酌渺余怀兮何言遡孤云兮寥廓

长城

长城巍巍起洮水盘踞蜿蜒九千里朔云浩浩天茫茫悲笳落日腥风起犹传鬼神风雨夕知是当时苦苛役征人白骨掩寒沙化作年年春草碧祖龙为谋真过计自成限域非天意力穷城杵怨声沈祸起萧墙险难恃岂知一朝貔虎来关东咸阳宫殿三月红

吴僧能诗自号心听必欲求证为著转语庄子至人之息以踵众人之息以喉

吾闻至人踵息不以喉师今心听欲废耳师能借听役以心心我都忘听何起说空已是自纏缚只此了然皆具足不如无听亦无心渴则饮茶饥食粥

余昔年邂逅登山东卢长卿之门遂联轡游京师真所谓倾盖如故者也别六年重过其庐则已为他人屠沽肆矣因诘隣翁乃知以穷徙他所遂往访之緼緼话旧成短歌以勉之

君才英妙如终童豪气傲兀山之东观光曾共游京国重来风雨非旧宅休言煮字不疗饥煮愁那得愁熟时王家纸尾一十万罗胸撑肠五千卷读书寫字虽两途时来喝采皆梟卢丈夫穷达固难必谁肯低头老蓬荜不妨起舞夜闻鸡赵尧何止居刀笔

次韵白石庵

空山白石何嶙峋石根有水流苍云岩花泫露照初日野鸟交戛青林春飞楼隱隱出林杪闭门芝术生奇芬道人宴坐百念寂睨视外物皆浮尘吾观万法了一电何暇究意追途津欣然默会如有得起试鳳饼■〈难上火下〉枯薪拍阑一笑碧霞外清风为我吹嚣氛听师清谈洗净业睠我皓首穷玄文忽惊秀句写山色紫翠满几争披纷松声万壑不可和试携绿绮当晴曛

呈袁伯长学士

直庐高寒插穹窿日高槐翠深重重仙人傲兀瀛与蓬紫霞飞佩裳芙蓉澄澄秋水
炯两瞳峥嵘气挟太华峰冰悬雪跨磊砢胸直攀斗柄■〈奭斗〉天浆手提文印六一
翁姓氏藉藉传儿童银河倒泻淬笔锋清文五纬丽太空讲论六籍恢深洪皇猷黼黻天
开容老余賔客曾登龙反观礼乐拜下风赋归偃卧苍山中十年云树吟江东重寻故武
来观光瓣香御袖怀冲冲苦吟依旧号秋虫黑貂敝尽心徒雄遗音谁取爨下桐散樗馊
落甘长终公司文苑声赫隆芒端寒燠参化工庇寒更愿苏瘵恫勿负四海斯文宗

寄赵秋水提点【清斋】

神仙谪世自奇绝误读黄庭俱浪说银潢秋水淡精神绛雪玄霜老风骨寰区腥腐
那敢供若木可攀芝可掇有时宴坐意逍遥万象达观无起灭我惭短褐老京尘忆曾携
手都门别玉书煜煜青霞囊直上仙都锵珮玦天风吹老碧莲秋高啸鼎湖峯顶月白云
来去本无心老鹤孤鹑瀛海濶竭来十载喜相逢笑我红尘早华髮苍精含景紫芒寒落
塵玄谈洒松雪蓬莱茗盃和香啜芙蓉露冷秋云滑

次韵冯仲远听隣舟孟监州琵琶

江州司马真愁绝浔阳夜醉黄垆月琵琶拨动儿女情泪湿青衫寫淒切汉东杰客
老监州云梦胸中吐奇崛春风斗酒忽邂逅暮雨扁舟谈激烈酒酣古调手自传鵠弦撼
动龙香拨抑扬按节气雄放清度回飈激林樾迢迢诉尽出关情汉宫往事孤鸿灭黄云
万里绝音尘马上谁能记呜咽新声洗尽郁轮袍清和扣舷歌间发曲终一笑两茫然江
水泠泠满襟雪

次韵济翁叔并谢诸公

一尊俯仰乾坤濶何处蓬莱白银阙百川东去无回波白日人间事如织安能久挽
林下鞅要挹终南嵩华碧壮游直上黄金台赫弈光华弥上国三年客梦天之北梅花万
里关山月对酒亦有新丰歌题名未问游岩宅吟裾不曳王公门禁林曾谒文章伯满襟
逸兴征鸿高过眼浮荣流电疾云山恋恋未忘情岁月悠悠易成昔酸风已破黑貂裘晴
湾又割沙鸥席陪翁夜话不忍眠银烛花残仍见跋诸公忽畀金薤章十袭九緹良足惜
老韩险语轧霄峥大陆雄文妙英发剡溪玉板洒乌丸句中风露含秋色方今妙选需贤
才遗韵重宣机籟寂青云当赋杏园诗白首毋寻草玄笔

甓社湖冻合舟胶不行借陈彦谦韵

天风吹涛搅琼汁崩腾一夜坚如石白银色界曙光寒粼粼失却玻璃碧篙师竞击
声礧礧千捶撼动蛟人室孤篷正似莲叶舟安得乘风从太乙

呈闲闲宗师吴公

上界仙官紫宸客朱颜雪额双瞳碧超然心与造化游回头风雨人间窄金函玉印
来帝傍赞书屡下紫泥香珠裳寶璐映星月苍精含景生寒芒年光老我红尘裏遥睇蓬
莱隔弱水金丹何日乞刀圭聊跨白鸿三万里

朋旧有以前韵和者再韵答之

观光萃萃京华客十千沽酒春壶碧酒酣濯足新丰歌眼底嵩华沧溟窄欣然一笑
来我傍共谈诗传春风香兴豪磊落出奇语骊珠落袖摇光芒不须偃蹇衡门里气槩匣
中三尺水名驹未肯伏盐车会见权奇日千里

贺欧阳公除翰林学士

高寒禁署含冰玉瀛洲老仙岩电目袍锦团团紫鳳花帽光隱隱青螺粟丝纶夜半
催宣布香艷宫壶新雨露砚池一滴紫毫春霏霏恩波遍寰宇

呈揭曼硕监丞

玉皇案吏来青冥夜捧紫诏飞云輶天章绚烂五就采光气直向奎躔明雄才独擅
燕许手照世奕弈垂高名大篇春容金玉振醉墨光怪云烟生门人执笔漱芳润变化总
作中朝英嗟余观光老賓客瓣香仰止怀生平焦桐倘许奏流水古意或可追■（音至）
猷顾公风谊薄霄汉邂逅定见双瞳青西清邃阁不可近何日暂借蓬瀛登

次韵湖亭秋望

红衣老尽玻璃国孤屿人烟落秋色豆花过雨水风凉落日残蝉疎树碧雁天紺滑
秋云净玉函炯炯开寒镜蟾枝香冷酒微醒长笛一声无尽兴

冷泉亭

昔人来自天竺国缥缈孤云伴飞锡天风吹落凝不去化作奇峯耸空碧至今裂峡
余云髓桂冷松香流未已翠光围住玉壶秋不放晴雷度山趾道人宴坐无生灭炯炯层
胸照冰雪夜深出定汲清泠寒猿啼断西岩月

次韵程渠南春日

阿咸归叩山中扉袖出巨轴当春辉粲然光态转流丽妬妇谁敢憎蛾眉雄辞奇险
神鬼愕瘦字光怪蛟蛇飞多君书暇追胜集意气豪爽惊愚痴前川花柳寓真乐心契往
古夫何疑哀余亦有风雩兴兀坐一室嗟奚为诵君妙句音何希白社今见元微之

题潘好古诗卷

繫古道之久混兮谓渭浊而泾清耳所适以是悦兮纷瓦釜兮雷鸣岂大雅之不作
兮由世尚之所徵何独子之好古兮得非娉节而特行念朱弦之既绝兮岂鸾胶之足凭
谅吾朴之弗凿兮又何恤乎亏成振寥寥之孤响兮嗟彼聋俗而畴顾当郑卫之声哇兮
乃独唱乎咸濩惟心游於太古兮发冲泊之天趣将抱瑟而从之兮爰写余之中素竚落
月之遗音兮渺松风於秋曙

徐雪楼贫乐亭

双溪之流兮何沄沄溪之山兮何嶙峋亭之筑兮溪之濱趾白石兮颠苍云櫟薨张
兮壮且文孰貽名兮匪宾世所乐兮崇货珍子乃反是兮乐以贫子之场兮有菌子之甑
兮无尘虽偈偈均约素兮能不汨乎物迁岂好修以矫行兮余疑信之未分子绳其枢兮
衡其门酌溪渌兮毋甘而尊頽潜鱼兮仰飞鸢妙化机兮道所存目击心会兮奚托於言
将忘物我兮内适以真邈悠悠於千载兮颜哉何人

和樵

山深兮林密石耸兮径微薪之兮樵之冒岚雨兮跻欹危木臃肿兮难伐仰难挽兮
乔枝俯榛棘兮离离刺吾手兮勾吾衣憇佳荫兮太息睇白云兮自怡顾人生兮良勤维
富贵兮多违龟曳尾兮斯乐鹤断脰兮则悲聊徜徉兮委顺我忘世兮世宁我知日云夕
兮凄烟霏啸山鬼兮号狐狸归兮归兮毋迟迟余需子兮溪之湄

栖碧

此山山人乐乎栖碧之趣乃为歌曰红尘扰扰兮毋将车白云邃幽兮山之隅地偏
兮心遠爰处兮爰居种菊兮满径植梅兮绕庐竹娟娟兮堂下草蔚蔚兮庭除操风瓢兮
酌春酒蹑露履兮锄秋蔬涉芳洲兮采杜若汲清泉兮瀹云腴听松声兮宴坐和樵歌兮
啸舒外视兮不足内乐兮有余彼失此得兮何异於梦鹿朝三暮四兮奚取乎诈狙穷兮
未必非达亲兮亦或为疎樗臃肿兮全天年骥权奇兮困驰驱客有过余而和之曰维子
之乐兮固放情於丘壑逢时之清兮胡不徼世之名誉既隱居以求志何语怪而言迂不
若忘言以栖碧吾将从子兮维吾驹

题张子敬墨竹图

翠琳琅兮楚楚风萧萧兮在户运滴水於毫端兮散淇澳之烟雨

题施德趣怪松图

奋苍髯於绝壁兮倚天骨之峥嵘偃高高之绝素兮俄飒飒其风生势摧减而凭陵
兮吾恐雷雨之昼冥

淞江观潮

钱塘江上风飏飏谁驱逆水回西流海门山色暗蛾绿翕忽湏洞惊吴艘飞廉贾勇
咄神变倒掀沧溟跃天半阆闾霹雳驾羣龙高击琼崖卷水岸初疑大鲸嘘浪来瀛洲银
山雪屋烂不收又疑当时捍筑射强弩至今水战酣貔貅溪盈壑满留不住怒无泄处潜
回去乘除消长无停机断送人间几朝暮吴依何事观不休落日苍波万古愁汀苹沙雁
年年秋海云一抹天尽头

次韵春日即事

吴蚕欲老畴未秧拍堤野水回横塘淡烟疎树绿陰薄落花飞絮白日长寒具油乾
过冷节恩恩芳事归鷓鴣枕书睡足午窗明雪乳浮浮翻兔褐

淮东早发

扁舟早发淮东城城头急鼓催残更水田漠漠白雁落老树惨惨羣乌惊簪翁笏妇
溢羣蚁重湖卷葑联云平青旗茅屋竞呼酒老我一醉消春酲

听泉席上赋茶■〈廿縻〉

修条盘出笼春碧满架花开春院寂青蛟脱骨翠波寒玉练摇光紺云密东风清润
晓阑深襟袖飘飘兰麝湿典型元在酒杯中摇碎琼蕤和露吸

题程南渠诗卷

前年挟策登燕台豹关天北高崔嵬九衢冠剑拥红雾四时鼓吹酣晴雷今年归踏
苍山雪白云与我情相悦穷檐扫轨澹无营饭牛依旧柴门月美人久别心所怀履齿不
印山中苔划然奚囊随裴几五色照我双睂开千林摇落嗟岁晚大雅寥寥国风远骊黄
色外得骅骝盆盎丛中出圭瓚银钩翠薤相屈盘清辉薄我襟袖寒修鲸勇掣海涛紧锦
段未许轻卷还怀哉吾道随舒卷八风低翅从渠短何时握手话雄襟为碾春云翻雪盃
桃源图

千重万重莲瓣山小天包在山中间神椎凿门石扇裂冷香迸出桃花湾渔郎寻春
踏溪尾撞入桃花小天裏荒邨人家无几家五百年来孙换子不邑不城无忧乡驾云为
屋霞为墙丹鸡叫烟桂岩冷白牛耕雨芝田香眼中惊见尘中客持酒争来问乡国鹿走
荒山西复东龙渡长江又南北听阑此语意猖狂月明假榻松间房明朝出山重回首山
迷水乱云茫茫武陵太守意未省强要寻源造灵境若使灵境长可通淳俗定变浇漓风

此山诗集卷五

●钦定四库全书

此山诗集卷六

（元）周权 撰

○五言律诗

溪邨即事

寒翠飞崖壁尘躔此地分鹤行松径雨僧倚石阑云竹色溪陰见梅香岸曲闻山翁
邀客饮闲话总成文

曙岩上人

岩扉人不到竹色满僧阑林雨添经润牕云入砚寒夜龕猫占卧晨钵鹤分餐客至
无余事敲冰煮月团

答张渭滨

与子三年别相思日几回携琴松下石沽酒陇头梅驿远诗难寄山深雁不来渭滨
千亩竹瞻溯重徘徊

过上居

数里榕陰合迢迢过客稀溪烟桑子熟山雨药苗肥牕冷云侵坐琴清月在扉怡然
无俗事我已早忘机

赠别

之子梁园彦才华迥不羣书灯双鬓雪野饭一犁云久病怜为客多愁忍送君钟山
吾旧隱不用勒移文

访张山民

又携诗卷出几度不逢君枯沼肥添雨寒松暖借云山牕多树色石径老苔纹后夜
梅应发清樽拟共分

次韵古琴上人

曳杖云中寺岚生古殿陰泉水冬涧涩山雨夜钟沈酒熟邨家近梅开野岸深松风
千古意留客听清琴

野趣

地偏居自穩石路接平田云合茅檐树雨添花涧泉空山晴滴翠遠水绿生烟唤酒
青林渡斜阳系客船

赠别

南雁归应尽携书始问程别离情易恶贫贱意难明树色春城暗钟声晓寺清孤灯
山驿酒后夜共谁倾

晓望

极目秋无际寥寥倦客心幽琴苍树合野棹绿荷深宿露涵清曙残云破遠陰新凉
无限兴携杖向东林

僧舍逢故人

空寂禅栖地趺然偶盃簪关河千里道风雨十年心归鹤投松暝流萤度竹深绝怜
清夜兴话旧不成吟

倦游

万事双蓬鬓江山赋倦游断猿明月曙疎雨碧梧秋道路中年感琵琶后夜愁客怀
无处寫离思满沧洲

野寺

■〈舟羲〉棹投兰若逢僧话白头百年王谢燕万里海翁鸥流水山门古闲云野
殿秋夜深钟磬绝鹤唳楚山幽

宵征

野路无邨传迢迢第几程天河山外落江月水中行客久衣偏冷车单马易惊前津
分曙色依约有农耕

次韵江德华

酷为吟成癖怜君带眼寬亲闱方念遠客路早知寒疎树蝉声杂长空雁影单悠悠
江汉潤樽酒寫情欢

郭外

郭外人家少渔邨颺酒旗江云低压树沙竹细穿篱地暖梅花早天寒潮信迟夕阳
烟景外倚杖立移时

意行

约畧三家市溪回野路分轻噉晞竹露宿雨落松云山寺依岩见邨春隔坞闻欣欣
农事集聊得狎鸥羣

社日

端居忘节序物化静中观
远岫春云淡深村社雨寒
溪花红映屋阶树绿平阑
喧醉田间叟鸡豚日暮欢

山庄夜宿

岸帻闲舒啸襟怀爽似秋
荷深香细细云澹意悠悠
流水空山静残蝉绿树稠
偶来成独宿凉月夜当楼

卜隐次韵

养钝习成癖居贫道已闻
蒲团延客话芋火就僧分
林润夜疑雨牕寒曙拂云
蓊蓊墙下菊书暇亦锄耘

来云僧舍

联云开佛屋接竹引岩泉
路滑迷霜叶钟寒湿曙烟
有为皆是幻无想总成禅
梦觉僧檐雨重来又十年

次韵钱济川

颺■〈舟羲〉东风棹相逢
汉水滨一尊东岷酒万里
北归人柳拂官桥晓花明
驿路春明朝又山岳怅别
漫劳神

次韵江德华

寂寞山阳市相欢把酒卮
江湖千里客风月一囊诗
渡晚归人少沙寒落雁迟
明朝淮水隔何处寄相思

沈云趣

逃名萧散客结屋跨云根
风月供千首乾坤寄一樽
孤钟临水寺长笛落梅村
读易筠窗下超然隔世喧

嵇子安迁居

半世湘东客欣然遂卜居
澹烟沙外径明月竹边庐
潦缩寒溪净秋高老树疎
别来无便雁为况近何如

汪良甫夜饮

潇洒一杯酒临风写素琴
潮生春浦暗月落夜城沉
拂曙星河淡含烟草树深
长歌休语别华髮欲盈簪

次韵王可道

楚楚山陰彦长游楚水滨
尺书新寄雁十载几怀人
客梦芦花雨诗情柳絮春
何时归话旧沽酒荐吴莼

再次邵本初韵钓台

羊裘人已远犹说汉江山
不为三公贵轻抛半日闲
遗台苍树杪清濂白云湾
千载惟鸥鸟相看不厚颜

和同舟叶宰韵

邂逅南归客扁舟共问津
一尊风月兴万里水云深
京洛红尘旧功名白髮新
新看

吾道泰梅报一枝春

客中送张归云

相逢俱是客对酒感流年落日沙头雁清风树杪蝉山钟隔林寺江火趁潮船何日
茅檐下清灯话雪川

此山诗集卷六

●钦定四库全书

此山诗集卷七

（元）周权 撰

○七言律诗

金山妙高台

妙高台上金为界不二门中鍊作关万古云根擎梵刹六朝山色入僧阑浮沈世事
风涛外突兀楼台宇宙间往古兴亡多少恨夕阳送尽暮钟寒

秋霁

梧雨声乾爽籁生年华流水鬓星星夜涵露气漫漫白秋入山光楚楚青歌树带蝉
侵竹座断云和雁落芦汀酒醒谁鼓松风操炷罢炉薰洗耳听

次韵村居秋日

瓜芋芄芄绿满畴村居客意乐深幽白云僧屋开孤嶂疎竹人家带浅流半榻清灯
初耿夜一声长笛欲横秋何时归把沧洲钓已畎闲盟向白鸥

赠松崖道士

名山歷遍气飘浮面带风霜雪满头碧涧寒通丹井曙青松影落石坛秋布袍洗药
香犹湿砂釜藏茶火自留笑问阇风何处是追游还许借青牛

春初宿湖山精舍次云崖道士韵

竹床纸阁净无尘僧芋阑边偶共分炉火夜红松节耐渚波春绿荻芽新林深瀑润
全疑雨日落山寒半是云相对不知身是客了然房琯悟前因

西邨

松深翠气薄吟衣曲径盘盘护槿篱野碓春泉分涧急山钟送曙出云迟人家绿艾
端阳节天气黄梅细雨时刈麦插秧农事足西郊生意绿无涯

挽徐松轩

漫说颜童骨可仙养生至理亦难言世情谁恻西州路座客空怀北海樽花落鹃啼
江树碧松深鹤怨岭云昏可怜旷代风流尽独酌南薰一断魂

金陵怀古

繁华富贵逐风飏玉树酣歌似昨朝千载英雄总丘陇六朝兴废付渔樵花空紫禁
人烟合路断金根王气销旧事已随流水远澄江夜夜自平潮

暮春

绿树亭亭午荫迟倦游情思不成诗落花春晚客中酒啼鸟日长人正棋盘篆香销
空院寂秋千影阁画阑欹闲边颇适观鱼兴飞絮风萍约半池

邨行

风落渔歌隔浦闻前邨独树正斜曛谁家桃李迷荒棘高陇牛羊卧古坟桥断春堤
多积雨溪深野碓自春云青旗摇曳疎林处剩把闲题与客分

病起

坐学跏趺念已轻偶亲药裹识参苓半年多病头应白万事无心梦转清剩有农谈
来野老已无官况忤山灵不嫌葛带频移眼得似梅花太瘦生

次韵甘露寺

神人高处卓云根龙脊横空势欲奔江上青山几今古檐前白日自朝昏僧依泉石
心逾远蜃吐楼台气不吞搔首长怀烟树表数声渔笛欲销魂

挽徐克谦教授

富贵莺花旧雪川当时曾识米家船十年菊负渊明酒半世芹香郑老藁月落淮云
沈断雁夜寒楚雨怨芳荃些歌空叠西风裏谁为孤桐续断弦

张氏新居

小雨东风拂袂寒神仙华屋画图间茶香入座午烟歇花影压帘春昼闲翠竹白沙
泉细细朱阑绿树鸟关关客来一笑推碁局坐占溪南十里山

赠云趣道人

玉笙声断海风寒曾访丹丘覓大还万里蓬瀛黄鹤晚十年云水白鸥闲花开把酒
吟消日茶罢携琴坐看山笑杀红尘吹客梦神仙元只在人间

次韵和靖墓

断碣难磨照世名当年马鬣野云平飘浮鹤梦横空冷惨淡梅魂绕树清雪后园林
谁独步夜深水月定同盟我来俯仰湖光裏一盏寒泉荐落英

次韵云山上人

绿竹数椽茅一把生涯流水意逍遥当堦苍石平为磴跨涧危槎卧作桥芳术旋收
同茗煮落花闲入和香烧月明露冷青松夜野鹤翩翩不可招

秋日

石脉泉花蘸眼明竹根沙路旧经行云归天际山容淡日落江头雁影横梧叶庭除
秋渐老豆花篱落晚初晴客行迢递归心远烟火苍茫起暮城

次韵陈伯和

溪曲扁舟载鹤归客来谈笑有余师共倾郑老灯前酒细和坡翁海上诗雪后生涯
黄菊长年来心事白鸥知文章千载传宗印毋惜玄机露一丝

次韵友人求狸奴

裹盐覓得乌圆小鼠穴俱空堵室安闲藉花陰眠昼暖时亲蒲座伴更阑多年不厌

无鱼食数子新添减鹤餐分送故人应好去慎防书架莫辞难

次韵闲居

钟鼎山林有命存游心物外已忘言希夷太华烟霞室处士孤山水月邨
龊龊可怜鸡舞瓮昂昂未羡鹤乘轩不须对客谈余事笑领琴歌竹下樽

次韵秋望

暮鸦归处断霞明搔首风前万里情烟抹山光翠屏冷水涵天影玉壶清
虫鸣莎径宵初永雁落芦汀月未生何事数声江上笛吹将离恨满孤城

江村夜泊

山拥孤城枕大江数间草阁寄吟床月笼沙碛当牕白风撼潮声拍枕凉
黄叶萧萧人不寐青灯耿耿夜初长云深老雁归何日肠断蒹葭水一方

张氏闲居

昂藏老鹤守书堂更有闲云护短墙眼底何年看突兀人生随处且相羊
岚蒸暖翠侵帟润风约飞花入座香不管莺簧喧客梦树阴佳处借绳床

次韵友人

人向青云听足音如何投策向山林桃花飞处晓溪急燕子归时春雨深
百岁闲愁消醪醕一襟古意托瑶琴相逢我自怜顛顚莫把清辞作楚吟

晚春

轻车繁吹尚纷纭袞袞香浮紫陌尘杜宇青山三月暮桃花流水一溪云
东风旗旆亭中酒小雨阑干柳外人何许数声牛背笛天涯芳草正斜曛

访陈子高德星堂

短策青衫借晚凉偶来谈笑德星堂竹深四壁生虚籁山近半邨无夕阳
池折泉声归座爽松蒸云气湿衣香萧然门巷无轮鞅隐几观书味更长

次韵孟韶卿

知道龐公不出山客来访鹤借山看海棠开尽雨方歇燕子来迟春尚寒
一坞烟霞随步履千峯紫翠入凭阑掉头巢父成何事漫向珊瑚拂钓竿

送友东归

东华厌逐輭红尘一见潘郎兴味真落落孤松霄壑志昂昂野鹤水云身
关山客梦三更月驿路梅花十里春谁唱渭城朝雨曲座中愁绝未归人

次韵元日

尧历新开五鳳云浩然不尽化生仁十年未觉江湖梦一气又回天地春
香老梅花逾蕴藉青归山色渐精神东风先扫溪南柳万缕鹅黄看得匀

郊行

瘦籐扶我陟层冈遠塔招人到上方跻胜喜随双足健幽寻翻得一身忙
春生涧壑蒸云暖露滴松杉染袖香景物牵诗吟不了水声山色意偏长

次韵山斋

娟娟万竹照清溪约住闲云作伴栖邻曲樵人曾结社樽前诗客偶分题东风一树棠梨老落日千山谢豹嘯闲向静中叅物化人间岐路任东西

挽刘声翁

独怀经济负雄姿缓带轻裘鬓欲丝挥麈清谈惊四座登楼高卧视羣儿结庐郭外看山近留月樽前宴客迟已矣九原呼不起为研松露寫哀辞

九日

座上风流忆孟嘉凭高目断楚天涯百年岁月催蓬鬓十载江湖负菊花小雨酿寒侵白苧西风怜醉避乌纱闲携榔栗吟归路流水残云带晚霞

雨后观荷

云敛湖天玉界明洗妆拥出万娉婷水光泼眼睛方好花气撩人远益清夜月阑干人不寐晚风襟袖酒微醒女郎急桨归何处隔浦时闻语笑声

次韵友人

司马山川忆壮游匣中剑气尚横秋怀人空有春天树乘兴都无雪夜舟年少文章慕西汉风流人物擅南州缚麟老手今无几不数当年赵倚楼

毘陵城东

数家烟火自成邻寂寞荒祠野水濱坏屋有基余瓦砾古坟无主自荆榛暄风绿树莺声老晓雨青郊虎迹新四月三山山下路野田犹殿菜花春

茶■〈廿麼〉和韵

东风架上剪青瑶小院陰陰閤閤寥白鳳联翩翻露彩翠虬夭矫驾烟条坐来芳荫吟逾好嗅尽清香醉已消见说唐宫寒食宴借渠风味酒中飘

谢惠桂花赋

清梦曾游白帝乡手挥云汉酌天浆文经五纬星辰粲笔染三秋风露香暂谪尘寰隠丛桂好排闥阖赋长杨偶来访我山云裏落袖骊珠照夜光

挽袁伯长学士诗稿曾蒙题跋

賔客如云藹縉绅紫霄高处掌丝纶曾留东阁观奇士几为北门思老臣自愧俚谣无律吕岂期长物入陶钧十年不下梁松拜回首俄惊宰树春

文采风流白玉堂华星云汉丽寒芒春袍昼日明宫锦晓佩天风冷水苍玉笋班中人遽远金花牋上墨犹香登龙旧日侯门客来奠梅花欲断肠

信题

虎头食肉浑无分闲隠白云幽桂丛岁月催人成老大江山遗恨几英雄平生心事琴三叠末路人情酒一钟挂颊西山成久坐更无尘可污西风

此山诗集卷七

●钦定四库全书

此山诗集卷八

（元）周权 撰

○七言律诗

对雪

冻合江云噤晓乌重裘添尽客寒多扁舟剡曲谁清兴斗酒新丰自浩歌天地一壶开玉界星沙万斛落银河醉敲冰砚题新句无奈坡翁白战何

代友人赋挽章二首

籍籍家声说大冯凛然高谊动诸公风神爽秀壶冰炯肝胆轮囷剑气雄九曲溪深仙梦杳三生石冷俗缘空灵輶千里归何暮些断招魂落雁风

逸气英英湖海杰眼中余子邈难侔非同龔蕴携家隐要挟卢敖举臂游鹤帐梦寒苍岭月虹桥宴罢幔亭秋西轩空有高吟地旧竹萧萧起暮愁

次韵吕菊趣

腰间剑气欲凌云合是青云向上人琼液吸空杯底月金■〈金 义〉歌动座间春味同霜菊香逾晚墨卷秋涛笔有神别后悠悠江汉隔因风每忆寄书频

次韵全可竹

一元妙化不停枢和气陶陶逐物初鸠雨欲晴桑叶晚燕泥新湿杏花余偶携野客看云坐闲拟春题就竹书新涨拍阑风日净溶溶暖绿护阶除

同褚思古夜饮

十年契濶感飘零剪烛西牕故旧情海上飞鹏风万里云边鸣雁月三更驻颜未试青精饭酺白先叨玉糝羹别后酒徒星散尽梅花犹自岁寒盟

多景楼

北固峯高翠色浮断崖千尺障东流谁言宇宙无多景今见江山第一楼云气晓寒檐箔雨涛声夜落海门秋客来莫问孙刘事很石苔深万古愁

淮海

浩浩长河涉要津地连吴楚势雄分夕阳一望连荒草昔日几番吹战尘夜静栖鸟惊野月高风寒雁落空云年登巷陌家家酒鱼蟹堆盘况味真

京都

水入金河灏玉虹填街车马拥尘红九重天近风云壮万雉城高鼓角雄花底催朝冠佩列酒边听曲绮罗丛太平光景春台乐物物薰陶圣化中

阙下遥瞻

乾坤瑞气蔼燕山天仗初开虎豹关金爵觚稜银汉表玉堦平城彩云间紫泥香暖春宣诏清蹕声寒晓趣班千载明良今庆会喜看新雨涤尘寰

二

剑佩声磨九轨衢欢传虎拜听嵩呼一天雨露流春泽万古山河壮地图造化机缄

新宇宙太平气象又唐虞丹心一寸葵倾处夜夜泰阶明六符

三

穆穆皇风世道淳吾君敛福锡斯民六龙日焕彤墀晓五凤云深紫禁春洞达遐荒
无异俗痒痾疾痛视同仁野人亲覩朝纲整可是乾坤气象新

看镜

年华暗逐水东流试拂青铜满袖秋病髮易凋成种种壮心不竞付休休风霜道路
知添老烟雨关山不奈愁何日赋归林下去一樽聊与慰萧飕

次韵子昂学士人日立春赵诗

今年人日与春并人得春来喜气迎宫柳风微金缕重御沟冰泮玉鳞生陰消渐觉
余寒散阳长争看晓日明霜鬢彩幡浑不称强裁新句慰羈情

人日今年乐事并新春只遣鬢幡迎一元块北新调變万物洪纖总发生早有东风
消腊冻渐舒昕日作晴明玉堂人醉梅花底门帖新题羈宦情

悯忠阁

危梯飞构上云端气象雄深势屹蟠万里乾坤双望眼千年城郭一凭阑销磨丹腹
风霜老凌厉青冥星斗寒日暮无穷怀古意残碑字字拂苔看

次前韵

万法丝毫露一端屹然龙象起飞蟠佛超大地三千界人立中天十二阑香火道場
传世久虚空潮梵落云寒我来振袂西风表已作五台台上看

徐可翁总管

枯山咫尺不相逢万里飘零始识公江表一麾头欲雪床头孤劒气如虹分忘贵贱
襟期古论到行藏意趣同多谢过从情恋恋为怜逆旅困新丰

有怀

鼎食难登苜蓿盘藟盐滋味笑儒酸白云望断亲闱遠红叶吟残客路寒心事蹉跎
忙裏过人情翻覆静中看何如归去苍山下闲听松风煮月团

次韵孙子野

山川已入史迁笔乡里还从马少游万里乾坤双短髮五湖风月一扁舟飘零末路
谁青眼归去沧洲愧白鸥有地可耕书可读吾生此外复何求

次韵罗济之

浪说骑鲸汗漫游客寒未办鸛鷖裘征鸿影裏三更月落木声中万里秋高下楼台
歌吹海往来冠盖帝王州观光要适平生志莫叹周南久滞留

怀归

携琴两载泊京华馈鲤无人雁不过客路重阳归未得吾庐三径近如何白云日望
关心久明月天涯归梦多寄语此山堂下鹤一竿分合老渔簑

岱岳

巉巉拔地老危峯不许龟蒙耸大东半夜赤光低海日九霄寒翠落天风荡磨云气
风雷近镇压坤维气势雄可恠客帆留不住瓣香无路谒云宫

次韵吴子善讲学来云僧舍

笔耕还有砚为田分得云僧半榻眠徇道不妨贫是病忘言自爱默成禅文章信手
窥天巧涂抹何心取世妍坐听松风弦大雅逍遥应复梦钧天

次韵闲居

纳纳乾坤付一杯穷通赋分信悠哉冰霜气味甘餐栢铁石心肠可赋梅自足一丘
闲寄傲怕荒三径早归来怀人几动山陰兴夜雪扁舟兴尽回

次韵姜潜夫钓台

误烦聘使下青云天上归来只故人自分终身隱丘壑何心横足动星辰高风尚激
严滩水老树相传汉代春身为东都倡名节云台事业付功臣

和韵

世途处处马牛风时命虽仇道未穷半世生涯如沫黍十年踪迹等飘蓬周南留滞
情虽恶蓟北登临气自雄雪点吟髭尘扑面且归伸足卧山中

刘北山

匆匆聚散若抔沙感旧交游两鬓华明月停杯谪仙酒碧云浮盃玉川茶人於罕会
襟期厚诗寫幽情趣味嘉别后北山堂下桂秋风黄雪几番花

贺欧阳公除翰林学士

除书飞下五云端光焕蓬莱紫气间照世声名山岳重绝尘襟度雪霜寒玉堂昼永
紉书好紫砚春浓草诏闲入覲清光天咫尺又分莲烛下金銮

呈陈众仲助教

園桥词翰妙无穷快写平生磊落胸下榻清风延孺子高楼豪气卧元龙关山梦隔
云千里雨露恩流天九重又佩江南文印去秋红一路正芙蓉

叶敬常贤良

谈笑青云激壮怀决科射策尚徘徊超超麾电鞭霆手落落昂霄耸壑材檐雨青灯
官舍酒乡心明月故园梅快哉此去魁多士万里骅骝道路开

谢欧阳学士

曾洒骊珠被短编七襄欲报邈天孙空怀春草池塘梦莫写梅花水月魂台阁文章
端典雅山林气质借清温牀头萍绿多矜色长价还从薛卞门

黄致和提点回自上京

凌厉刚风笑傲间兴豪不管紫笙寒独飞明月丹霞佩遥赴清都玉殿班虚室春和
融二景苍精霜气薄三韩归来羨尔清溪鹤犹带闲云守洞关

晚春

花事怱怱弹指顷人家寒食雨晴天香浮夜月梨团雪绿染春风柳罨烟涉世百年

真逆旅忘机万事即安禅独怜顚顚江湖客犹记风流掉酒船

次韵令尹解官归九江

满眼山河落木秋远游时复赋登楼解官彭泽如元亮呼酒新丰似马周岁月駸寻人易老乾坤浩荡水空流输君已了公家事卧对庐山雪满头

金焦两山

海瞰红处谒仙山不管刚风客棹寒一鉴寒光开玉匣两螺青黛落银盘天低塔影搀云耸地窄钟声度水宽羨杀禅心如止水任教四面自波澜

呈马伯庸御史中丞

振岳威声耸豸冠袖中直笔佞难干玉壶冰照一襟炯白简霜飞六月寒谔谔清风扬海内稜稜劲节著云端绝怜白首南州士山斗弥高独仰韩

次韵陈伯和

满襟风雪抱琴归妙论如逢易九师东阁观梅一樽酒西窗剪烛十年诗江湖汗漫心犹在岁月峥嵘鬓已知闲说少年都似梦醉挥白笔写乌丝

次韵陈可道

清谈洒洒许文休袖有骊珠莫暗投一味可人曲居士半生取友石乡侯无边风月归吟啸有好溪山即钓游目送孤云弦绿绮落花风絮兴悠悠

挽潘举翁

曾坐春风醉巨罗风流谈麈听悬河稜稜气节生难敌籍籍声名死不磨洛社衣冠知有几襄阳耆旧惜无多可堪执紼溪前路烟雨凄凄听薤歌

嬾庵讲主得九江饼茶邓同知分饷其半汲泉试之因次韵

解组归来万事轻日长门巷淡无营团香小饼分僧供折足寒铛对客烹色卷空云春雪涌影沈江月夜潮生一瓿洗却红尘梦坐爱风前晚笛横

夜泊僧庐

孤城灯火已萧然独鹤犹归破远烟钟鼓声沈沙外月楼台影浸水中天寒声有意侵僧榻俗梦无由到客毡笑我久乖松下约夜凉归兴转凄然

此山诗集卷八

●钦定四库全书

此山诗集卷九

（元）周权 撰

○五言绝句

次韵僧惠茶

开樽酌溪渌秋兴何萧骚重哦惠休句目送吴鸿高

悼白石道士冯鹤屿

白石长碧苔闲庭落珠蕊老鹤去不还空山自流水

杂兴

泉花湿堦云篆烟寒瓦鼎柴门闲树陰坐玩清昼永
闭门屏来辙枕书睡初熟觉来淡无惊看遍堦南竹
流水数家邨青山白云坞春晚落红深夜寒溪上雨
凉蟾净如洗酒醒夜初寂山檐宿雨多空堦响余滴
枯藤坠晚花竹外溪光满山僧出几时石上云犹暖
酸风侵短褐野路迂涧南薄暮欲飞雪梅香点归骖
晨光烂乌几博山穗烟碧山童汲泉花来作砚蟾滴
倦迹无造请卜居翠微深幽意素所惬泉声隔空林
蹇童引羸骖路入苍巘去深处有人家鸡鸣白云树
暮霰袭吟袍夜火然枯竹盎然坐春和炉香芋初熟
看松坐危石瀹茗爨枯箨振衣下山去白云满幽壑
西阳转林腰水木愈清丽归云不肯栖浩荡弄山翠
野芳韵幽襟暄景逗春意僧居白云深清磬出林际
此山诗集卷九

●钦定四库全书

此山诗集卷十

（元）周权 撰

○七言绝句

客至

闲携雪瀑煮春茶多病无钱送酒家怪底今朝来好客青灯开彻夜来花
题松

桑树鸡鸣坎吠蛙午烟隔水几人家青松将谓专霜雪春到山中亦有花
扫径

剥啄无人昼掩门庭花春晚雪纷纷山童不解山翁意扫破苍苔一径云
溪上

薄云残雨晓天晴暖翠浮岚入袂青岸阁渔舟人不见桃花深处水泠泠
晚眺

闪闪归鸦过别林斜阳流水意沈沈数声樵笛人何处一路寒山晚翠深
立春

宴罢春盘转晓风乾坤生意浩无穷宿云新卷山前雨元气淋漓万木中
雪霁

寒侵竹屋瓦灯青独据枯梧兴似僧落月推窗看残雪梅花半树一溪水
渔翁

鹤髮崢嶸兩鬢絲白鷗相近久忘機綠簑帶雨不垂釣閑掃秋雲坐石磯
轉棹收緡日未西短篷斜閣斷沙低賣魚買酒歸來晚風颭芦花雪滿溪
晚望

帖帖平疇稻未黃疎烟老樹帶秋光山鐘敲斷前邨雨一兩歸鴉背夕陽
寫梅花賦

竹屋青燈夜寂寥十年江海鬢蕭蕭興來寫盡梅花賦月在寒梢雪未消
讀騷

靈均忠憤不能平寫盡芳蘭杜若情底事楚烟湘雨外梅花不肯與騷盟
首陽

采擷芳甘豈療飢首陽千古怨斜暉至今山下冰霜冷不見春風長蕨薇
元日

東風收雪曙光開春意濃浮栢葉杯晴日滿帘賓客散寒暄先問隔年梅
携琴

半生湖海鬢星星歸卧山林抱一經起向梅花寫岑寂琴心三疊水泠泠
西軒

幽夢初圓昼景長黃鸝聲歇燕飛忙西軒過雨春雲合綠氣濃薰筆硯香
信題

已識浮雲似世情歲寒老硯是心朋平生不貸監河粟自擷香芹煮潤冰
雪後

野梅香暖雪初晴客子離居意似僧欲策陳玄供醉帖硯寒猶帶夜來冰
立秋日晚坐

山雲漠漠樹蒼蒼風荐池荷滿意香獨據繩床眠未得一檐風雨夜初涼
次韻友竹弟南明山

秋深櫺葉滿空山飯罢僧袍挂石欄洗盡十年塵土夢天風吹瀑落雲寒
晚渡

離離野樹綠生烟灼灼山花爛欲然酤酒人歸春渡寂柳根閑系夕陽船
九日山行

玉削雲邊紫石岡天風吹瀑下雲庄行行携客尋詩去濃把茶煎當菊觴
桃源圖

蒼茫烟水隔塵凡源上霞蒸曲曲山一自漁郎歸去後武陵春色滿人間
送狸奴無言師

香積清齋禪老家地無余鼠漉塵沙狸奴不用慚尸素清夜蒲團伴結伽
次韻晚眺

翠潤侵衣竹滿闌雨余爽氣挹西山一聲孤鶴歸何晚帶得閑雲作伴還

邨居

疎竹人家短短墙绿陰深处水村凉山风吹断岩前雨高树蝉声正夕阳
晓行

依稀林影弄晨光满袖东风野兴长沙岸雪消春润暖一湾流水落梅香
九日

霜螯新斫茱橙香风物繁华感异乡剩买黄花簪帽额市楼呼酒作重阳
除夕长河客舟

爆竹声中岁又阑画船列烛照波寒清樽今夕同谁饮自买梅花对烛看
夜投山寺

深萝一径曲通幽空翠霏霏拥殿浮桂冷松香僧睡去月明闲却一庭秋
白石庵

地幽山气霭空岚落叶萧萧白石庵归鹤一声无覓处松梢擎日影穆穆
和友人韵

北觀天光雨露低芒寒阁道应文奎高秋木落关河濶万里风云壮马蹄
后土祠琼花

东风何处擅浓华只有扬州第一花天上羣仙肤似雪绿云深拥七香车
清真道院

空翠霏霏霭洞天蹋云来访洞中仙满襟诗思清如水写尽松花一砚烟
晚棹

白水青林荡晚晴野禽树底向人鸣乘风十幅蒲帆饱快试淮南第一程
即事

晨墟跣妇鬻鱼鰕两岸■〈髟上了下〉童牧艾豸赋敛输官农事足太平气象属
淮沙

雨后

鸣鸠村暗晓寒天白水交流乱野田落尽残红春不管一川风雨阁榆烟
次韵冯仲遠

长河柳暗春波碧青帘摇曳厨烟寂客舟无处醉梨花自买豚鱼作寒食
刘伶坟【在淮安州】

荷锺相随死便埋平生六合等浮埃千年一醉不知晓谁向苍苔酹一杯
偶题

东风吹绿遍天涯陌上晴烟漾柳花鹤髮老人茅店下一樽相对话桑麻
邳州

百战残城古下邳白门楼下草凄凄古来多少英雄恨落月城头乌夜啼
进履桥

博浪沙头恨未消
秦项不终朝
汉家四百年
宗社开辟洪基在此桥
沛县

天连荒艸入青原
古县残桥拥一廛
千载芒砀销王气
斜阳孤水落寒烟
道傍即事

闲马嘶云牧遠荒
高原下隰尽耕鋤
太平里巷都无事
老卒支颐听读书
武城县

牛刀小试恢恢手
庭讼都无犴狱空
直把弦歌为县谱
寥寥千载接清风
凌州

萦纡河水走长虬
汨汨黄泥逐浪浮
揉断櫓声惊睡熟
一舟冲雨下凌州
端午

河上人家插艾蒿
纷纷炊黍荐香醪
客怀寥落真无那
暮雨孤舟读楚骚
客枕

落叶萧萧拥石阑
辘轳声断井花乾
夜深天濶霜风紧
雁落沧江月正寒
欧阳学士过访

玉堂仙忽枉华镳
客舍如何采涧毛
袖有建溪春一掬
莱山石鼎煮银涛
晓秋

浦溆明寒透橘洲
雁风吹老一天秋
渔翁醉卧芦花底
流水晚烟闲钓舟
值雨憩僧舍

昼篆萤行香半残
隔阑翠柳拂疎烟
勿论尘土东华客
著我僧氊听雨眠
次韵瓜洲渡

江花江水两悠悠
万事匆匆付白头
又向瓜州买樽酒
一篷烟雨话扬州
潘易斋寫水墨梅

胸中一卷画前易
笔底万斛江南春
莫向冰纨寫孤洁
从他水月自传神
水天一碧亭

吟鬓萧萧风雪客
黄河太华曾亲识
振衣舒啸巍然亭
目尽江淮天一碧
吴秋山寫江淮秋意

江天漠漠秋无际
数点淮山冷屏翠
闲拈枯笔洒松腴
半幅生绡千里意
此山诗集卷十

●跋

栝苍周此山诗若干首故翰林侍读学士袁公伯长谓其意度闲遠议论雄深今翰林直学士欧阳君原功则谓其无险劲之辞而有深长之味无轻靡之习而有春容之风江浙提举陈君众仲又谓其简淡和平语多奇隽三君子之言皆信於世则君之诗信可以传矣余友翰林修撰宋显夫哀集中统至元以来之诗特选其精者手自缮寫已逾数千篇而犹采摭未已期他日锓梓以传余欲求此山此集示之而众仲之官余杭携其诗

稿与俱往周君亦将归栝苍矣则显夫之所集者犹有沧海遗珠之一恨也周君其肯录以寄余乎翰林待制中顺大夫兼国史院编修官谢端跋

●跋

余近从国子先生陈君众仲读所作周君衡之诗集叙恨未见其诗与其人后月余衡之并携故袁文靖公伯长今欧阳翰林原功所为叙见余乐道里且以诗见贻适余在公未还及读三家所为叙及其诗益恨不及见其集与其人然以三家所称虽不及见而其人之贤其集之可传可见矣夫诗道之在天下其正如日月星辰山川草木鸟兽其变如风云雷雹龙腾虎踞岂难知哉在尽其常通其变而已惜不得与衡之共论之元统二年九月二十日揭傒斯书